

671.1238
078
131

卷六十九列傳三
列女卷七十列傳二
十三列女下

永平府志

永平府志卷六十九

列傳二十一

列女中

遼

邢簡妻陳氏營州人父陞五代時累官司徒陳氏甫笄涉通經義凡覽詩賦輒成誦尤好吟詠時以女秀才名之年二十歸於簡孝舅姑閨門和睦親黨推重有六子陳氏親教以經後二子抱樸抱質皆以賢任宰相統和十二年卒睿智皇后聞之嗟悼贈魯國夫人刻石以表其行及遷祔遣使以祭論者謂貞靜柔順婦道母儀始終無歉云

遼史列女傳

明

王氏者上元主簿張昴窻室也嫡齊氏生子國祥王甫娶而昴卒時年十九隨嫡扶櫬還里族人欲奪其志泣曰余雖妾夫固官也事他人奈何七日不飲食自縊者再皆以救免後以房產盡遺族人移居城中以避其鋒撫國祥成立出仕年七十卒

庠生宋文耀妻張氏不育納妾尤氏生二子尤年二十一夫亡與嫡矢志撫孤家業賴以不墜子景光景瑗俱游庠邑宰以雙節旌之

國朝

宋梯雲妻馬氏年十六歸宋逾年翁之秦絕秬姑旋沒
又一年而夫亡無子女惟祖翁存祖翁名景時曾任
青陽令時耄老不能動履飲食便溺惟氏一人是賴
後繼子又夭至於再繼蓋集蓼茹荼四十年中曾無
一日之甘嗚呼酷矣

張氏馮昌熾妻也夫病謂氏曰我病必不起家貧無依
汝當奈何氏不語而泣曰然則嫁也氏勃然曰君姑
養病勿過慮儻有不諱地下當相見耳嗣見夫病危
遂投繯死次日昌熾乃死氏時年二十二

劉氏夫名失傳舅趙萬忠氏年十九夫亡無子父母勸

改適氏不從備楮帛奠夫墓晝夜哭潛自縊死其家
訟舅於官司理某得其情杖其父而旌之

正黃旗張玉林妻高氏年十九生子可立甫彌月而玉
林歿先是玉林母佟氏亦二十一歲而孀時玉林方
三歲良田數頃爲豪右所併家遂貧及玉林成立赴
愬於都抑鬱客死氏聞訃攜其母弟襁子而行泣訴
於部院事得直盡返其先疇遠近以奇女子稱之性
慈善好施而教子獨嚴有過必予杖或勸之曰吾非
不愛憐寡婦子多以驕敗縱容之恐不成人耳可立
終身謹飭以居積致富每語人曰微吾母無今日矣

卒年七十三嘉慶三年旌

高氏按察使棠萼女孫也適莊坨周氏二十一歲而寡遺腹生子懷清周本素封氏以儉約持家性嚴重見之者氣爲之肅家人雖居私室無敢欬笑者晚年族眾欲爲請旌固辭之強而後可懸額於門戚友畢賀氏撫膺終日數月後卽命撤去曰吾重違族眾意也奚以額爲同治壬戌年七十一得疾時子已前卒彌留際屬其孫曰吾聞以節旌者立木主於縣之節孝祠吾清苦一生俾胥吏具文從事弗願也且聞守祠無人乞旬常借爲棲所木主顛倒錯亂身後受穢多

永平府志 卷之六
三
矣謹記勿爲言終遂逝

蘇氏馮際隆妻也于歸後值翁誤斃人命際隆代父戍廣西行有日矣氏泣謂之曰君桎梏數千里妾何忍在家坐享溫飽且君歸無期此生好合已矣請以魂伴君行遂縊

貞女張氏名素蘭莫各堡人幼從外大父讀書通大義精祿命學父哲充邑里社書社總書秦某中傷革役且乾沒其代納之錢哲恚憤死妻孥子幼相對飲泣時女年二十誓明父冤質之縣某以賄餌弗爲理厯質之府道亦弗理質之藩憲始下其事於府冤乃白

復其役以與其子蓋二年中跋涉艱難瀕於死者數
矣仇雖復而家益貧乃與母約終身弗嫁藉推祿命
以養母母不能奪每出必與母偕所言多奇驗性閑
靜寡言霜色滿面指甲長七八寸糾曲如蚓而作字
極速清整有法邑人王涪厓明府爲作孝女傳見年
七十三

劉履泰妻甯氏年二十一夫亡遺孤方週歲姑又繼沒
家素貧身復多病乃繡佛長齋性貞靜寡言笑終日
閉戶如無人焉者父教之以高王經晨夕誦之後遂
辟穀日惟飲水或閒食少許菜果已四五年於今矣

然勤於女紅刀尺機杼聲時與經聲相聞見年五十精力猶不少衰

田氏張各莊譚光楷繼室枌樹嶺人二十歲而嫁二十一歲殉夫死時同治四年五月也初氏家貧十一歲賣與張姓婦爲婢婦故孀也愛之若女同治三年八月適譚譚故賈於吉林合卺逾月卽行氏爲理客裝皆井井臨別無依戀邑人以爲賢十二月譚沒於外道遠氏弗之知也及是聞信大哭盡日夜遂僵臥不言亦不食十餘日氣垂絕矣家人強灌以水忽張目視曰人以生爲樂我以生爲戚勿相強乃死夫柩至

同日合葬焉

趙氏東莊坨人夫亡後家事零落丁產俱絕不得已寄居母家里有周姓者富甲一鄉中年失偶知其賢託媒求之氏曰妾初婚時未嘗不如人孤苦至於今日者命也安可羨人之富而忘己之命乎終不改適

鄭氏深港閭錫恩妻也錫恩病天閹鄭歸年方十七數月而錫恩亡又二年其姑亦亡家赤貧氏紡績易食事翁如父復佃富室田數畝耕耘收穫皆身任之或以改適勸焉則曰吾如此命也命不可強改適何爲勸者歎息去今已五十餘歲矣窮困如故而志節益

堅人咸敬之

張于堂妻趙氏年二十四夫亡無子舅姑早逝繼夫從子定方爲嗣後入武庠兼撫夫弟于陞成立爲娶室張氏年餘陞又亡張年方二十亦無子族中無可繼者乃依嫂勵志守節事孀嫂如姑撫孤姪如子紡績餬口甘苦相依苦節四十餘年而歿

趙夢麟妻席氏年三十一夫亡遺三子氏治家有則訓子有方飲冰茹檠六十餘載壽九十三而終次子延輔妻郭氏年二十八延輔亡三子延傑妻高氏年二十五延傑亦亡俱苦節完貞人無間言壽七十餘而

終督學錢公給扁旌曰三松蘊翠

曹培元妻朱氏年二十二夫亡家貧無子撫從子承祧
年六十餘卒培元弟三寶妻楊氏年十九而寶亡撫
遺腹子成立苦節五十餘年卒里人稱曰一門雙節
李廷錡妻韓氏八歲時童養夫家及笄婚配至二十六
歲夫出外不歸月餘生一子家赤貧子不能養晚年
窮困至八旬投水自盡

馬已任妻魯氏年二十七夫亡守節教子秉信入國學
娣崔氏與任妻嫁三旬而與任歿遂矢志共守熒熒
相依魯年八十一卒崔年六十九卒督學李公給扁

旌曰雙節齊芳

齊德全妻廖氏湖北黃梅人先是德全流徙江西建昌府娶氏生二女後又路拾一女撫之年二十六夫故誓不改適每欲扶夫櫬回籍以路遠不果咸豐間髮逆倡亂氏乘間掩夫柩寄二長女於外戚家負幼女逃出晝伏夜行得歸原籍夫弟道全性篤友于於干戈稍定之時返兄柩暨二女姪同治七八年間灤水泛溢廬舍陷沒現僦屋而居氏之苦節弟之悌弟蓋一時稱二難云

張隆本妻梁氏夫瞽而貧姑再醮婦也生二女一子翁

遠商姑深惡前子而虐遇氏年二十六夫亡撫四歲孤苦守姑藉口買棺無貲逼改適不從旋生遺腹子姑凍斃之並逐氏他徙氏無奈攜子往依於夫同母姊家子稍長習賈遂少裕厥後夫弟外出不歸姑衣食不給氏迎養如初爲子娶婦生孫子又歿氏上事衰姑下撫孀媳穉孫艱苦備嘗今孫際舜入邑庠援例報捐府經皆氏教養力也年八十二卒同治二年

題旌

劉鳳儀妻楊氏夫故遺子女各一女三歲旋天課子讀書以紡績供膏火子讀不慧令習商關外及歸省爲

之納婦未逾月而子歿與媳矢志守節始終不渝

劉大智妻劉氏年二十四夫亡嗣子娶婦任病歿遺女
二繼娶張甫六年歿遺女一繼娶張又歿復娶王數
年之間喪三媳撫三女孫心勞力瘁備極艱苦

邢鳳喈妻劉氏年十九夫亡孤方在抱舅姑勸令改適
不從刺一目以見志孝事舅姑撫孤更新成立守節
至八十餘歲卒後更新早逝妻杜氏年二十亦承姑
志守節終身

徐氏福建游擊張定亨繼室也隨夫引見旋里至杭
州夫病故宦橐蕭然氏鬻服飾扶柩行數千里備嘗

艱苦卒得歸葬夫骨於祖阡前室子二後皆夭逝時家已中落撫九歲孫教養兼至誠女中傑出者

戴永楨妻金氏夫故子女俱無矢志不嫁孝事孀姑人有諷以改適者氏大痛引刀斷其一指曰有再作此語者視此指觀者皆錯愕後繼堂姪德爲嗣教之遊庠孫光澍亦入泮皆氏一人之力也

宋國桓妻錢氏夫故誓不渝節繼姪邑增生焜爲嗣娶邵氏甫一年而焜亡邵亦無出姑媳共矢堅貞相依爲命錢歿邵哀毀骨立孑然一身而節愈苦矣

孫惟柱妻曹氏受聘後夫卽嬰痼疾花燭夕幾不能成

禮無何病益增劇遂奄忽以歿距嫁時僅三十七日
人皆悲其遇之慘氏乃安之若素妣某氏癡絕生三
子二女若膜不相關者自孩提以至成人凡保抱提
攜鋪啜衣履皆氏身任其勞不特兒女輩忘其爲叔
母卽氏亦幾忘之迨婚嫁後各生子女且蕃盛氏一
一劬育之飲食教誨無岐視暮年三姪毓美婦病歿
遺子女各三氏憐其繼母之多累轉恐其待之寡恩
也又撫之如前皆賴以成立統計氏所恩勤撫育者
三十三人其天性慈祥有高出尋常萬萬者徒欽其
苦節堅貞猶淺也繼姪毓秀爲嗣年八十二卒